

REPUBLIKA E SHQIPËRISË
KRYEMINISTRI

URDHËR

Nr. 44, datë 28.3.2023

PËR

**NJË NDRYSHIM NË URDHRIN NR.40, DATË 20.2.2020,
TË KRYEMINISTRIT, “PËR PËRBËRJEN, ORGANIZIMIN
DHE FUNKSIONIMIN E BORDIT TË INFORMACIONIT
GJEOHAPËSINOR”**

Në mbështetje të pikës 3, të nenit 102, të Kushtetutës, dhe të pikës 2, të nenit 10, të ligjit nr.72/2012, “Për organizimin dhe funksionimin e infrastrukturës kombëtare të informacionit gjeohapësinor në Republikën e Shqipërisë”,

URDHËROJ:

Në pikën 2, të urdhrit nr.40, datë 20.2.2020, të Kryeministrit, fjalia e parë ndryshohet, si më poshtë vijon:

“Bordi të kryesohet nga drejtori i kabinetit të Zëvendëskryeministrit.”.

Ky urdhër hyn në fuqi menjëherë.

KRYEMINISTRI

EDI RAMA

NR.PROT. 975/1
DATË 30.3.2023


ZËVENDËSKRYEMINISTRIT
AUTORITETIT SHTETËROR PËR INFORMACIONIN
GJEOHAPËSINOR

Sekretari i Përgjithshëm

Engjell AGACI



A circular blue ink stamp is positioned behind the signature. The stamp contains the text 'REPUBLIKA E SHqipërisë' at the top and 'KESHILLI I MINISTRARË' at the bottom. In the center of the stamp is the coat of arms of Albania.



REPUBLIKA E SHQIPËRISË
KRYEMINISTRI

U R D H Ë R

Nr. 40, datë 20.2.2020

PËR

**PËRBËRJEN, ORGANIZIMIN DHE FUNKSIONIMIN E BORDIT
TË INFORMACIONIT GJEOHAPËSINOR**

Në mbështetje të pikës 3, të nenit 102, të Kushtetutës, dhe të pikës 2, të nenit 10, të ligjit nr.72/2012, “Për organizimin dhe funksionimin e infrastrukturës kombëtare të informacionit gjeohapësinor në Republikën e Shqipërisë”, me propozimin e Zëvendëskryeministrit,

U R D H Ë R O J:

1. Ngritjen e Bordit të Informacionit Gjeohapësinor (BIG).
2. Bordi të kryesohet nga drejtori i Departamentit të Zhvillimit dhe Mirëqeverisjes në Kryeministri. Në mungesë të kryesuesit, mbledhjet e bordit të drejtohen nga Drejtori i Përgjithshëm i Autoritetit Shtetëror për Informacionin Gjeohapësinor.
3. Bordi i Informacionit Gjeohapësinor të ketë në përbërje këta anëtarë:
 - Drejtorin e Përgjithshëm të Autoritetit Shtetëror për Informacionin Gjeohapësinor;
 - Drejtorin e Përgjithshëm të Agjencisë Kombëtare të Shoqërisë së Informacionit;
 - Drejtorin e Përgjithshëm të Agjencisë Kombëtare të Planifikimit të Territorit;
 - Drejtorin e Përgjithshëm të Agjencisë Shtetërore të Kadastrës;
 - Drejtorin e Institutit të Gjeografisë dhe Infrastrukturës Ushtarake;
 - Drejtorin e Përgjithshëm të Shërbimit Gjeologjik Shqiptar;
 - Një përfaqësues të Ministrisë së Financave dhe Ekonomisë;
 - Një përfaqësues të Ministrisë së Bujqësisë dhe Zhvillimit Rural;

- Një përfaqësues të Ministrisë së Turizmit dhe Mjedisit;
- Një përfaqësues të Ministrisë së Infrastrukturës dhe Energjisë.

4. Në mbledhjet e Bordit të Informacionit Gjeohapësinor ftohen të marrin pjesë:

- Shefi i Departamentit të Gjeodezisë, pranë Fakultetit të Inxhinierisë së Ndërtimit;
- Përfaqësues të shoqatave të bashkive;
- Përfaqësues të Shoqatës së Inxhinierëve Gjeodetë, të licencuar;
- Përfaqësues të autoriteteve publike, përgjegjëse për temat e informacionit gjeohapësinor në varësi të tematikës që shqyrtohet;
- Ekspertë të fushave të ndryshme, në varësi të tematikës që shqyrtohet.

5. Fusha e veprimtarisë së Bordit të Informacionit Gjeohapësinor të jetë këshillimi dhe formulimi i mendimeve e propozimeve lidhur me:

- zhvillimin e politikës kombëtare për infrastrukturën e informacionit gjeohapësinor;
- përmirësimin dhe plotësimin e legjislacionit në fuqi për infrastrukturën kombëtare të informacionit gjeohapësinor;
- zhvillimin dhe përmirësimin e teknologjisë në fushën e informacionit gjeohapësinor;
- përcaktimin e temave të tjera të gjeoinformacionit sipas parashikimeve të këtij ligji;
- vendimet e ASIG-ut për mbledhjen, përpunimin dhe/ose përditësimin e të dhënave gjeohapësinore nga autoritetet publike sipas temave përkatëse;
- përcaktimin e standardeve shtetërore dhe rregullave uniforme për krijimin e sistemeve të informacionit gjeohapësinor, për secilën temë;
- rregullat e hartuara nga ASIG-u për krijimin, përditësimin, shkëmbimin, aksesin dhe përdorimin e grupeve të të dhënave gjeohapësinore, shërbimeve të të dhënave gjeohapësinore dhe *metadata*-ve;
- rregullat e hartuara nga ASIG-u për realizimin e ndërveprueshmërisë;
- përcaktimin e kushteve që lidhen me krijimin e GIS-it kombëtar;
- përcaktimin e rregullave për aksesin dhe shkëmbimin e informacionit gjeohapësinor nga subjektet publike dhe private;
- nismat e institucioneve publike në fushën e informacionit gjeohapësinor;
- përcaktimin e rregullave të administrimit të Gjeoportalit Kombëtar dhe ofrimit të shërbimeve ndaj publikut, nëpërmjet tij;
- çdo çështje tjetër që lidhet me infrastrukturën e informacionit gjeohapësinor.

6. Bordi i Informacionit Gjeohapësinor të ushtrojë veprimtarinë e tij në përputhje me rregulloren e brendshme, "Për organizimin dhe funksionimin e Bordit të

Informacionit Gjeohapësinor”, që i bashkëlidhet këtij urdhri dhe është pjesë përbërëse e tij.

7. Bordi për Informacionin Gjeohapësinor të organizojë forume vjetore lidhur me krijimin dhe përdorimin e informacionit gjeohapësinor me:
 - njësitë e vetëqeverisjes vendore;
 - profesionistët e fushës së gjeoinformacionit;
 - kontribuesit e mendimit akademik në fushën e gjeoinformacionit.
8. Urdhri nr.87, datë 25.7.2013, i Kryeministrit, “Për përbërjen, organizimin dhe funksionimin e Bordit për Informacionin Gjeohapësinor”, i ndryshuar, shfuqizohet.
9. Ngarkohet Bordi i Informacionit Gjeohapësinor për zbatimin e këtij urdhri.

Ky urdhër hyn në fuqi menjëherë.

KRYEMINISTRI

EDI RAMA



RREGULLORE

PËR

ORGANIZIMIN DHE FUNKSIONIMIN E BORDIT **TË INFORMACIONIT GJEOHAPËSINOR**

Neni 1 **Objekti**

Objekti i kësaj rregulloreje është përcaktimi i rregullave të organizimit dhe të funksionimit të Bordit të Informacionit Gjeohapësinor (BIG).

Neni 2 **Përkufizime**

Në kuptim të kësaj rregulloreje:

1. “BIG”, ka të njëjtin kuptim me atë të dhënë nga pika 3, e nenit 3, të ligjit nr.72/2012, “Për organizimin dhe funksionimin e infrastrukturës kombëtare të informacionit gjeohapësinor në Republikën e Shqipërisë”.
2. Ligji për infrastrukturën kombëtare të informacionit gjeohapësinor është ligji nr.72/2012, “Për organizimin dhe funksionimin e infrastrukturës kombëtare të informacionit gjeohapësinor në Republikën e Shqipërisë”.
3. “Autoriteti publik”, ka të njëjtin kuptim me atë të dhënë nga pika 2, e nenit 3, të ligjit nr.72, datë 28.6.2012, “Për organizimin dhe funksionimin e infrastrukturës kombëtare të informacionit gjeohapësinor në Republikën e Shqipërisë”.
4. “ASIG”, ka të njëjtin kuptim me atë të dhënë nga pika 1, e nenit 3, të ligjit nr.72/2012, “Për organizimin dhe funksionimin e infrastrukturës kombëtare të informacionit gjeohapësinor në Republikën e Shqipërisë”.

Neni 3 **Mbledhja e BIG-ut**

1. BIG-u diskuton dhe merr vendimet e nevojshme nëpërmjet mbledhjeve të tij. Mbledhja e BIG-ut është takimi zyrtar i anëtarëve të tij.
2. BIG-u mbledhet si rregull në mbledhje të zakonshme jo më pak se 4 herë në

- vit. Në raste të veçanta, mbledhja e BIG-ut thirret jashtë radhe, me kërkesën e motivuar të kryetarit të BIG-ut ose të 1/3 së anëtarëve të tij.
3. Njoftimi për vendin, kohën e mbledhjes, rendin e ditës, si dhe materialet që do të shqyrtohen, u dërgohen anëtarëve të BIG-ut të paktën gjashtë ditë përpara datës së mbledhjes.
 4. Mbledhjet e BIG-ut thirren dhe drejtohen nga kryetari i BIG-ut dhe, në mungesë të tij, nga drejtori i ASIG-ut.
 5. Mbledhjet e BIG-ut zhvillohen kur janë të pranishëm më shumë se 2/3 e anëtarëve. Në mbledhje marrin pjesë anëtarët, të ftuarit si dhe sekretariati teknik i BIG-ut.
 6. Mbledhjen e BIG-ut e hap dhe e drejton kryetari. Në fund të mbledhjes, kryetari deklaron mbylljen e saj dhe kur një ose disa çështje të rendit të ditës nuk arrijnë të shqyrtohen brenda ditës së mbledhjes, ai vendos vazhdimin e mbledhjes në një ditë tjetër.
 7. Kryetari i BIG-ut ushtron këto të drejta dhe përgjegjësi:
 - a) Thërret dhe drejton mbledhjet e BIG-ut;
 - b) Cakton rendin e ditës së mbledhjeve të BIG-ut në bashkëpunim me drejtorin e ASIG-ut;
 - c) Kujdeset që drejtimi i BIG-ut të jetë në përputhje me ligjin nr.72/2012, "Për organizimin dhe funksionimin e infrastrukturës kombëtare të informacionit gjeohapësinor në Republikën e Shqipërisë".

Neni 4

Përgatitja e materialeve dhe mënyra e paraqitjes së tyre

Përgatitja e materialeve, që do të merren në shqyrtim në mbledhjen e BIG-ut, do të bëhet nga sekretariati teknik i BIG-ut në përputhje të plotë me parashikimet e nenit 13, të rregullores, "Për organizimin dhe funksionimin e Autoritetit Shtetëror për Informacionin Gjeohapësinor", miratuar me vendimin nr.147, datë 20.2.2013, të Këshillit të Ministrave.

Neni 5

Procedura e marrjes së vendimit për mendimin e shprehur

1. BIG-u shpreh mendim për materialet e paraqitura, kur në mbledhjen e tij janë të pranishëm më shumë se 2/3 e anëtarëve.
2. Mendimi i shprehur duhet të mbështetet nga shumica e thjeshtë e votave të anëtarëve të pranishëm. Në rast votash të barabarta, vota e kryetarit të mbledhjes është përcaktuese.
3. Votimi bëhet me gojë ose me ngritje dore. Gjatë votimit nuk lejohen abstenime.
4. Në rastin kur një anëtar i BIG-ut ose pjesëtarë të familjes së tij kanë lidhje interesash të drejtpërdrejta ose të tërthorta me çështjen që trajtohet në mbledhje, ai detyrohet të deklarojë interesat e tij që në fillim të diskutimit dhe nuk merr pjesë në votim.
5. Në raste të veçanta, urgjente dhe tepër të rëndësishme, kryetari i BIG-ut mund të miratojë shprehjen e mendimit edhe pa u mbledhur BIG-u, por për këto raste, duhet të shprehin mendimin e tyre edhe minimumi 1/3 e anëtarëve të BIG-ut. Kryetari porosit marrjen e një vendimi qarkullues, i cili nënshkruhet më pas nga të gjithë anëtarët e BIG-ut që e miratojnë këtë vendim.

Neni 6

Dokumentimi i mbledhjeve

Dokumentimi i mbledhjeve të BIG-ut të bëhet nga sekretariati teknik i BIG-ut në përputhje me parashikimet e nenit 13, të rregullores, "Për organizimin dhe funksionimin e Autoritetit Shtetëror për Informacionin Gjeohapësinor", miratuar me vendimin nr.147, datë 20.2.2013, të Këshillit të Ministrave.

NR.PROT. 464/1
DATË 20.2. 2020

ZËVENDËSKRYEMINISTRIT
MINISTRISË SË FINANCAVE DHE EKONOMISË
MINISTRISË SË BUJQËSISË DHE ZHVILLIMIT
RURAL
MINISTRISË SË TURIZMIT DHE MJEDISIT
MINISTRISË SË INFRASTRUKTURËS DHE
ENERGJISË
AUTORITETIT SHTETËROR PËR INFORMACIONIN
GJEOPAPËSINOR
AGJENCISË KOMBËTARE TË SHOQËRISË SË
INFORMACIONIT
AGJENCISË KOMBËTARE TË PLANIFIKIMIT TË
TERRITORIT
AGJENCISË SHTETËRORE TË KADASTRËS

Sekretari i Përgjithshëm

Engjell AGAÇI

